

Z A K O N

O POREZU NA PREMIJE OSIGURANJA

I. OSNOVNE ODREDBE

Član 1

Ovim zakonom uvodi se obaveza obračunavanja i plaćanja poreza na premije obaveznog osiguranja od autoodgovornosti i poreza na premije kasko osiguranja motornih vozila (u daljem tekstu: porez na premije osiguranja) na području Republike Crne Gore (u daljem tekstu: Republika).

Član 2

Porez na premije osiguranja prihod je budžeta Republike.

II. PREDMET OPOREZIVANJA

Član 3

Porez na premije osiguranja plaća se na poslove osiguranja ostvarene po osnovu:

1) osiguranja korisnika, odnosno vlasnika motornih i priključnih vozila od odgovornosti za štetu koju upotrebom motornog vozila pričine trećim licima (u daljem tekstu: autoodgovornost);

2) kasko osiguranja motornih vozila.

Motorna i priključna vozila (u daljem tekstu: motorna vozila), u smislu stava 1 ovog člana, su vozila za prevoz lica, za prevoz stvari i za vuču i radna vozila koja, prema propisima o registraciji drumskih vozila, moraju imati saobraćajnu dozvolu koja se produžava u rokovima ne dužim od 12 mjeseci.

III. PORESKI OBVEZNIK

Član 4

Poreski obveznici su društva osiguranja koja s pravnim i fizičkim licima sklapaju ugovore i naplaćuju premije osiguranja od autoodgovornosti i kasko osiguranja motornih vozila, direktno ili indirektno, preko posrednika ili zastupnika.

IV. PORESKA OSNOVICA

Član 5

Poreska osnovica za utvrđivanje poreza na premije osiguranja je bruto premija osiguranja koju društvo za osiguranje utvrđuje pravnom ili fizičkom licu pri sklapanju ugovora o obaveznom osiguranju od autoodgovornosti, odnosno kasko osiguranju motornog vozila.

V. PORESKA STOPA

Član 6

Stopa poreza na premije osiguranja od autoodgovornosti iznosi 6% od ugovorene premije osiguranja od autoodgovornosti.

Stopa poreza na premije kasko osiguranja motornih vozila iznosi 3% od ugovorene premije osiguranja motornih vozila.

VI. PORESKA OSLOBOĐENJA

Član 7

Porez na premije osiguranja od autoodgovornosti, odnosno premije kasko osiguranja motornih vozila ne plaćaju diplomatska i konzularna predstavništva i međunarodne organizacije, ako je to predviđeno međunarodnim ugovorom.

VII. NASTANAK I PLAĆANJE PORESKE OBAVEZE

Član 8

Obaveza obračunavanja poreza na premije osiguranja nastaje u trenutku zaključenja ugovora s pravnim ili fizičkim licima.

Poreski obveznik iz člana 4 ovog zakona, porez na premije osiguranja plaća do petnaestog u mjesecu za prethodni mjesec.

Oblik i sadržaj evidencije o plaćanju poreza iz stava 2 ovog člana propisuje ministar finansija.

VIII. NADZOR

Član 9

Kontrolu obračunavanja i plaćanja poreza na premije osiguranja vrši nadležni poreski organ.

IX. SHODNA PRIMJENA

Član 10

Na odnose koji nijesu posebno uređeni ovim zakonom (prinudna naplata, kamate i dr.) shodno se primjenjuje zakon kojim se uređuje poreski postupak.

X. KAZNENE ODREDBE

Član 11

Novčanom kaznom od pedesetostrukog do stostrukog iznosa minimalne zarade u Republici kazniće se za prekršaj poreski obveznik:

- 1) ako na poresku osnovicu ne primijeni propisanu poresku stopu (čl. 5 i 6);
- 2) ako porez na premije osiguranja od autoodgovornosti, odnosno porez na premije kasko osiguranja motornih vozila ne obračuna i ne uplati u propisanom roku (član 8).

Za prekršaj iz stava 1 ovog člana kazniće se i odgovorno lice kod poreskog obveznika novčanom kaznom od petostrukog do dvadesetostrukog iznosa minimalne zarade u Republici.

XI. ZAVRŠNE ODREDBE

Član 12

Izuzetno od člana 2 ovog zakona, naplaćeni prihodi od poreza na premije osiguranja za 2004. godinu prihod su Republičkog fonda za zdravstvo.

Član 13

Ovaj zakon stupa na snagu osmog dana od dana objavljivanja u "Službenom listu Republike Crne Gore".